

地藏菩薩本願經

地藏菩薩本願經



悉曇學會

悉曇學會印贈

[www.siddham.org](http://www.siddham.org) [www.siddham.cn](http://www.siddham.cn)



ॐ ॐ ॐ ॐ ॐ ॐ ॐ ॐ ॐ ॐ ॐ ॐ ॐ ॐ ॐ  
 Nang Ma-oh Ha Ha Ha Va-ee Sa-ma Ya-eh Ah Va-ee Ra Ha-wu-anm Kaha-anm Sa-va-ahr Ha-ahr  
 曩 謨 訶 訶 訶 微 三 嘛 耶 啊 微 囉 吽 刊 薩 嚩 訶

ॐ ॐ ॐ ॐ ॐ ॐ ॐ ॐ ॐ ॐ  
 O-anm Par Ra Ma-ou Nang-ee Daha Nang-lalelue Sa-va-ahr Ha-ahr  
 喻 鉢 囉 末 鄰 陀 寧 薩 嚩 訶

悉曇地藏菩薩滅定業真言

地藏菩薩本願功德誦

稽首地藏王	功德妙難量	慈心深愈海	願力廣無疆
昔為光目女	大孝度親娘	供養過去佛	覺華自在王
感佛空中現	告知母生方	承汝孝敬力	出獄升天堂
光目心歡喜	立發大願王	願我盡未來	苦海作舟航
眾生悉度盡	我方證涅槃	地獄如未空	誓不作法王
發大誓願已	生生勇力強	歷劫修萬行	身居常極光
分身千百億	塵刹現地藏	常在幽冥中	方便作教王
救度諸眾生	脫苦升天堂	佛果悉皆圓	各界作道場
自現聲聞身	分身徧十方	無量合一身	一身化無量
佛在忉利天	金口讚地藏	功德妙難思	徧界利冥陽
若有諸眾生	禮念地藏王	所求皆如意	隨願功不唐

若有厭女身 恭塑地藏王  
若有殘缺人 敬刻地藏像  
後世得人身 具足丈夫相  
後世得人身 相好諸圓滿

地藏菩薩妙難論  
三塗六道聞妙法  
明珠照徹天堂路  
累劫親姻蒙接引  
化現金容處處分  
四生十類蒙慈恩  
金錫振開地獄門  
九蓮臺畔禮慈尊

淨身業真言

唵 修 哆 唎 修 哆 唎

O-anm Shia-ou Ta-ahr Ra-eh Shia-ou Ta-ahr Ra-eh  
唵 修 哆 唎 修 哆 唎

修 摩 唎 修 摩 唎 薩 訶

Shia-ou Ma Ra-eh Shia-ou Ma Ra-eh Sa-va-ahr Ha-ahr  
修 摩 唎 修 摩 唎 薩 訶

淨口業真言

唵 修 唎 修 唎 摩 訶 修 唎

O-anm Shia-ou Ra-eh Shia-ou Ra-eh Ma Ha-ahr Shia-ou Ra-eh  
唵 修 唎 修 唎 摩 訶 修 唎

修 修 唎 薩 訶

Shia-ou Shia-ou Ra-eh Sa-va-ahr Ha-ahr  
修 修 唎 薩 訶

淨意業真言

唵 囉 囉 怛 訶 吽

O-anm Va Zha-ra Daha Ha Ha-wu-anm  
唵 囉 囉 怛 訶 吽

安土地真言

曩 謨 三 滿 曩 哆 菩 駄 喃

Nang Ma-oh Sa-anm Ma Nang-ta Ba-ou Dahr-daha-ahr Nang-ahr-anm  
曩 謨 三 滿 曩 哆 菩 駄 喃

唵 囉 嚩 囉 嚩 囉 地 尾 薩 訶

O-anm Daha-ou Ra-ou Daha-ou Ra-ou Daha-va-ee Sa-va-ahr Ha-ahr  
唵 囉 嚩 囉 嚩 囉 地 尾 薩 訶

普供養真言

唵 誡 誡 曩 三 婆 囉 嚩 囉 吽

O-anm Ga Ga Nang Sa-anm Baha Ra Va Zha-ra Ha-wu-anm  
唵 誡 誡 曩 三 婆 囉 嚩 囉 吽

香讚

爐香乍爇 法界蒙熏 諸佛海會悉遙聞  
隨處結祥雲 誠意方殷 諸佛現全身  
南無香雲蓋菩薩摩訶薩 三稱

南無常住十方佛  
南無常住十方法  
南無常住十方僧  
南無本師釋迦牟尼佛  
南無大悲觀世音菩薩  
南無大願地藏王菩薩  
南無護法諸天菩薩

覺林菩薩偈

華嚴第四會 夜摩天宮 無量菩薩來集 說偈讚佛

爾時覺林菩薩 承佛威力 徧觀十方 而說頌言

譬如工畫師 分布諸彩色 虛妄取異相 大種無差別

大種中無色 色中無大種 亦不離大種 而有色可得

心中無彩畫 彩畫中無心 然不離於心 有彩畫可得

彼心恆不住 無量難思議 示現一切色 各各不相知

譬如工畫師 不能知自心 而由心故畫 諸法性如是

心如工畫師 能畫諸世間 五蘊悉從生 無法而不造

如心佛亦爾 如佛眾生然 應知佛與心 體性皆無盡

若人知心行 普造諸世間 是人則見佛 了佛真實性

心不住於身 身亦不住心 而能作佛事 自在未曾有

若人欲了知 三世一切佛 應觀法界性 一切唯心造

## 讚地藏菩薩偈

稽首本然淨心地 無盡佛藏大慈尊  
南方世界湧香雲 香雨華雲及華雨  
寶雨寶雲無數種 為祥為瑞徧莊嚴  
天人問佛是何因 佛言地藏菩薩至  
三世如來同讚歎 十方菩薩共歸依  
我今宿植善因緣 稱揚地藏真功德  
慈因積善 誓救眾生 手中金錫 振開地獄之門  
掌上明珠 光攝大千世界 智慧音裏 吉祥雲中  
為閻浮提苦眾生 作大證明功德主  
大悲大願大聖大慈本尊地藏菩薩摩訶薩

南無本師釋迦牟尼佛

三稱

開經偈

無上甚深微妙法  
百千萬劫難遭遇  
我今見聞得受持  
願解如來真實義

## 地藏菩薩本願經卷上

唐于闐國三藏沙門實叉難陀譯

### 忉利天宮神通品第一

如是我聞：一時佛在忉利天，為母說法。爾時，十方無量世界，不可說不可說一切諸佛及大菩薩摩訶薩皆來集會。讚歎釋迦牟尼佛，能於五濁惡世，現不可思議大智慧神通之力，調伏剛強眾生，知苦樂法，各遣侍者，問訊世尊。

是時，如來含笑，放百千萬億大光明雲，所謂大圓滿光明雲、大慈悲光明雲、大智慧光明雲、大般若光明雲、大三昧光明雲、大吉祥光明雲、大福德光明雲、大功德光明雲、大歸依光明雲、大讚歎光明雲。放如是等不可說光明雲已，又出種種微妙之音，所謂檀波羅蜜音、尸波羅蜜

音、羸提波羅密音、毗離耶波羅蜜音、禪波羅蜜音、般若波羅密音、慈悲音、喜捨音、解脫音、無漏音、智慧音、大智慧音、師子吼音、大師子吼音、雲雷音、大雲雷音。出如是等不可說不可說音已，娑婆世界，及他方國土，有無量億天龍鬼神，亦集到忉利天宮，所謂四天王天、忉利天、須燄摩天、兜率陀天、化樂天、他化自在天、梵眾天、梵輔天、大梵天、少光天、無量光天、光音天、少淨天、無量淨天、徧淨天、福生天、福愛天、廣果天、無想天、無煩天、無熱天、善見天、善現天、色究竟天、摩醯首羅天、乃至非想非非想處天，一切天眾、龍眾、鬼神等眾，悉來集會。

復有他方國土及娑婆世界，海神、江神、河神、樹神、山神、地神、川澤神、苗稼神、晝神、夜神、空神、天

神、飲食神、草木神，如是等神，皆來集會。復有他方國土及娑婆世界諸大鬼王，所謂惡目鬼王、噉血鬼王、噉精氣鬼王、噉胎卵鬼王、行病鬼王、攝毒鬼王、慈心鬼王、福利鬼王、大愛敬鬼王，如是等鬼王，皆來集會。

爾時，釋迦牟尼佛告文殊師利法王子菩薩摩訶薩：汝觀是一切諸佛菩薩及天龍鬼神，此世界、他世界，此國土、他國土，如是今來集會到忉利天者，汝知數否？

文殊師利白佛言：世尊！若以我神力，千劫測度，不能得知。

佛告文殊師利：吾以佛眼觀故，猶不盡數。此皆是地藏菩薩久遠劫來已度、當度、未度，已成就、當成就、未成就。

文殊師利白佛言：世尊！我已過去久修善根、證無礙

智、聞佛所言，即當信受。小果聲聞、天龍八部、及未來世諸眾生等，雖聞如來誠實之語，必懷疑惑，設使頂受，未免興謗。唯願世尊，廣說地藏菩薩摩訶薩，因地作何行？立何願？而能成就不思議事。

佛告文殊師利：譬如三千大千世界所有草木叢林、稻麻竹葦、山石微塵，一物一數，作一恆河，一恆河沙，一沙一界，一界之內，一塵一劫，一劫之內，所積塵數，盡充為劫，地藏菩薩證十地果位已來，千倍多於上喻，何況地藏菩薩在聲聞、辟支佛地。

文殊師利！此菩薩威神誓願，不可思議。若未來世，有善男子善女人，聞是菩薩名字，或讚歎、或瞻禮、或稱名、或供養，乃至彩畫刻鏤塑漆形像，是人當得百返生於三十三天，永不墮惡道。

文殊師利！是地藏菩薩摩訶薩，於過去久遠不可說不可說劫前，身為大長者子。時世有佛，號曰師子奮迅具足萬行如來。時長者子，見佛相好，千福莊嚴，因問彼佛：作何行願，而得此相？時師子奮迅具足萬行如來告長者子：欲證此身，當須久遠度脫一切受苦眾生。

文殊師利！時長者子，因發願言：我今盡未來際不可計劫，為是罪苦六道眾生，廣設方便，盡令解脫，而我自身，方成佛道。以是於彼佛前，立斯大願，于今百千萬億那由他不可說劫，尚為菩薩。

又於過去，不可思議阿僧祇劫，時世有佛，號曰覺華定自在王如來，彼佛壽命，四百千萬億阿僧祇劫。像法之中，有一婆羅門女，宿福深厚，眾所欽敬；行住坐臥，諸天衛護。其母信邪，常輕三寶。是時聖女，廣設方便，勸

誘其母，令生正見，而此女母，未全生信。不久命終，魂神墮在無間地獄。時婆羅門女，知母在世，不信因果，計當隨業，必生惡趣；遂賣家宅，廣求香華，及諸供具，於先佛塔寺，大興供養。見覺華定自在王如來，其形像在一寺中，塑畫威容，端嚴畢備。

時婆羅門女，瞻禮尊容，倍生敬仰。私自念言：佛名大覺，具一切智，若在世時，我母死後，儻來問佛，必知處所。時婆羅門女，垂泣良久，瞻戀如來。忽聞空中聲曰：泣者聖女，勿至悲哀！我今示汝母之去處。婆羅門女合掌向空而白空曰：是何神德，寬我憂慮？我自失母已來，晝夜憶戀，無處可問知母生界。時空中有聲，再報女曰：我是汝所瞻禮者，過去覺華定自在王如來，見汝憶母，倍於常情眾生之分故來告示。婆羅門女聞此聲已，舉身自撲

，肢節皆損。左右扶持，良久方穌，而白空曰：願佛慈愍，速說我母生界，我今身心將死不久。時覺華定自在王如來，告聖女曰：汝供養畢，但早返舍，端坐思惟吾之名號，即當知母所生去處。

時婆羅門女尋禮佛已，即歸其舍。以憶母故，端坐念覺華定自在王如來。經一日一夜，忽見自身到一海邊。其水涌沸，多諸惡獸，盡復鐵身，飛走海上，東西馳逐。見諸男子女人，百千萬數，出沒海中，被諸惡獸爭取食噉。又見夜叉，其形各異，或多手多眼、多足多頭、口牙外出，利刃如劍；驅諸罪人，使近惡獸，復自搏攫，頭足相就；其形萬類，不敢久視。時婆羅門女，以念佛力故，自然無懼。

有一鬼王，名曰無毒，稽首來迎，白聖女曰：善哉！

菩薩何緣來此？

時婆羅門女問鬼王曰：此是何處？無毒答曰：此是大鐵圍山西面第一重海。

聖女問曰：我聞鐵圍之內，地獄在中，是事實否？無毒答曰：實有地獄。

聖女問曰：我今云何得到獄所？無毒答曰：若非威神，即須業力，非此二事，終不能到。

聖女又問：此水何緣，而乃涌沸，多諸罪人，及以惡獸？無毒答曰：此是閻浮提造惡眾生新死之者，經四十九日後，無人繼嗣為作功德，救拔苦難，生時又無善因，當據本業所感地獄，自然先渡此海；海東十萬由旬，又有一海，其苦倍此；彼海之東，又有一海，其苦復倍，三業惡因之所招感，共號業海，其處是也。

聖女又問鬼王無毒曰：地獄何在？無毒答曰：三海之內，是大地獄，其數百千，各各差別；所謂大者，具有十八；次有五百，苦毒無量；次有千百，亦無量苦。

聖女又問大鬼王曰：我母死來未久，不知魂神當至何趣？

鬼王問聖女曰：菩薩之母，在生習何行業？

聖女答曰：我母邪見，譏毀三寶；設或暫信，旋又不敬；死雖日淺，未知生處。

無毒問曰：菩薩之母，姓氏何等？聖女答曰：我父我母，俱婆羅門種，父號尸羅善現，母號悅帝利。

無毒合掌啟菩薩曰：願聖者卻返本處，無至憂憶悲戀。悅帝利罪女，生天已來，經今三日；云承孝順之子，為母設供修福，布施覺華定自在王如來塔寺；非唯菩薩之母

，得脫地獄，應是無間罪人，此日悉得受樂，俱同生訖。鬼王言畢，合掌而退。婆羅門女，尋如夢歸；悟此事已，便於覺華定自在王如來塔像之前，立弘誓願，願我盡未來劫，應有罪苦眾生，廣設方便，使令解脫。

佛告文殊師利：時鬼王無毒者，當今財首菩薩是；婆羅門女者，即地藏菩薩是。

## 分身集會品第二

爾時，百千萬億不可思、不可議、不可量、不可說無量阿僧祇世界，所有地獄處，分身地藏菩薩，俱來集在忉利天宮。以如來神力故，各以方面，與諸得解脫從業道出者，亦各有千萬億那由他數，共持香華，來供養佛。彼諸同來等輩，皆因地藏菩薩教化，永不退轉於阿耨多羅三藐

三菩提。是諸眾等，久遠劫來，流浪生死，六道受苦，暫無休息。以地藏菩薩廣大慈悲，深誓願故，各獲果證。既至忉利，心懷踴躍，瞻仰如來，目不暫捨。

爾時，世尊舒金色臂，摩百千萬億不可思、不可議、不可量、不可說、無量阿僧祇世界，諸分身地藏菩薩摩訶薩頂，而作是言：吾於五濁惡世，教化如是剛強眾生，令心調伏，捨邪歸正，十有一二，尚惡習在；吾亦分身千百億，廣設方便。或有利根，聞即信受；或有善果，勤勸成就；或有暗鈍，久化方歸；或有業重，不生敬仰。如是等輩眾生，各各差別，分身度脫。或現男子身、或現女人身、或現天龍身、或現神鬼身、或現山林川原、河池泉井，利及於人，悉皆度脫。或現天帝身、或現梵王身、或現轉輪王身、或現居士身、或現國王身、或現宰輔身、或現官

屬身、或現比丘、比丘尼、優婆塞、優婆夷身、乃至聲聞、羅漢、辟支佛、菩薩等身而以化度，非但佛身獨現其前。汝觀吾累劫勤苦，度脫如是等難化剛強罪苦眾生，其有未調伏者隨業報應；若墮惡趣，受大苦時，汝當憶念吾在忉利天宮，殷勤付囑。令娑婆世界，至彌勒出世已來眾生，悉使解脫，永離諸苦，遇佛授記。

爾時，諸世界分身地藏菩薩共復一形，涕淚哀戀，白其佛言：我從久遠劫來，蒙佛接引，使獲不可思議神力，具大智慧。我所分身，徧滿百千萬億恆河沙世界，每一世界化百千萬億身，每一身度百千萬億人，令歸敬三寶，永離生死，至涅槃樂。但於佛法中所為善事，一毛一滷，一沙一塵，或毫髮許，我漸度脫，使獲大利。唯願世尊，不以後世惡業眾生為慮。如是三白佛言：唯願世尊，不以後

世惡業眾生為慮。

爾時，佛讚地藏菩薩言：善哉！善哉！吾助汝喜；汝能成就久遠劫來，發弘誓願，廣度將畢，即證菩提。

### 觀眾生業緣品第三

爾時，佛母摩耶夫人，恭敬合掌問地藏菩薩言：聖者！閻浮眾生，造業差別，所受報應，其事云何？地藏答言：千萬世界，乃及國土，或有地獄、或無地獄；或有女人、或無女人；或有佛法、或無佛法，乃至聲聞辟支佛，亦復如是，非但地獄罪報一等。摩耶夫人重白菩薩：且願聞於閻浮罪報所感惡趣。地藏答言：聖母！唯願聽受，我粗說之。佛母白言：願聖者說。

爾時，地藏菩薩白聖母言：南閻浮提，罪報名號如是

：若有眾生不孝父母，或至殺害，當墮無間地獄，千萬億劫，求出無期。若有眾生出佛身血，毀謗三寶，不敬尊經，亦當墮於無間地獄，千萬億劫，求出無期。若有眾生侵損常住，玷污僧尼，或伽藍內恣行淫欲，或殺或害，如是等輩，當墮無間地獄，千萬億劫，求出無期。若有眾生，偽作沙門，心非沙門，破用常住，欺誑白衣，違背戒律，種種造惡，如是等輩，當墮無間地獄，千萬億劫，求出無期。若有眾生，偷竊常住財物穀米，飲食衣服，乃至一物不與取者，當墮無間地獄，千萬億劫，求出無期。

地藏白言：聖母！若有眾生，作如是罪，當墮五無間地獄，求暫停苦一念不得。摩耶夫人重白地藏菩薩言：云何名為無間地獄？

地藏白言：聖母！諸有地獄在大鐵圍山之內，其大地

獄有一十八所，次有五百，名號各別，次有千百，名字亦別。無間獄者，其獄城周匝八萬餘里，其城純鐵，高一萬里，城上火聚，少有空缺。其獄城中，諸獄相連，名號各別。

獨有一獄，名曰無間，其獄周匝萬八千里，獄牆高一千里，悉是鐵圍，上火徹下，下火徹上。鐵蛇鐵狗，吐火馳逐獄牆之上，東西而走。獄中有床，徧滿萬里。一人受罪，自見其身徧臥滿床。千萬人受罪，亦各自見身滿床上。眾業所感獲報如是。

又諸罪人，備受眾苦。千百夜叉及以惡鬼，口牙如劍，眼如電光，手復銅爪，拖拽罪人。復有夜叉執大鐵戟，中罪人身，或中口鼻，或中腹背，拋空翻接，或置床上。復有鐵鷹陷罪人目。復有鐵蛇絞罪人頸。百肢節內，悉下

長釘，拔舌耕犁，抽腸剉斬，烱銅灌口，熱鐵纏身。萬死千生，業感如是。動經億劫，求出無期。此界壞時，寄生他界；他界次壞，轉寄他方；他方壞時，輾轉相寄；此界成後，還復而來。無間罪報，其事如是。

又五事業感，故稱無間。何等為五？一者，日夜受罪，以至劫數，無時間絕，故稱無間。二者，一人亦滿，多人亦滿，故稱無間。三者，罪器叉棒，鷹蛇狼犬，碓磨鋸鑿，剉斫鑊湯，鐵網鐵繩，鐵驢鐵馬，生革絡首，熱鐵澆身，飢吞鐵丸，渴飲鐵汁，從年竟劫，數那由他，苦楚相連，更無間斷，故稱無間。四者，不問男子女人，羌胡夷狄，老幼貴賤，或龍或神，或天或鬼，罪行業感，悉同受之，故稱無間。五者，若墮此獄，從初入時，至百千劫，一日一夜，萬死萬生，求一念間暫住不得，除非業盡，方

得受生，以此連綿，故稱無間。地藏菩薩白聖母言：無間地獄粗說如是。若廣說地獄罪器等名，及諸苦事，一劫之中，求說不盡。摩耶夫人聞已，愁憂合掌，頂禮而退。

#### 閻浮眾生業感品第四

爾時，地藏菩薩摩訶薩白佛言：世尊！我承佛如來威神力故，徧百千萬億世界，分是身形，救拔一切業報眾生。若非如來大慈力故，即不能作如是變化。我今又蒙佛付囑，至阿逸多成佛已來，六道眾生，遣令度脫。唯然，世尊！願不有慮。

爾時，佛告地藏菩薩：一切眾生未解脫者，性識無定，惡習結業，善習結果。為善為惡，逐境而生。輪轉五道，暫無休息，動經塵劫，迷惑障難。如魚游網，將是長流

，脫或暫出，又復遭網。以是等輩，吾當憂念。汝既畢是往願，累劫重誓，廣度罪輩，吾復何慮。

說是語時，會中有一菩薩摩訶薩，名定自在王，白佛言：世尊！地藏菩薩累劫已來，各發何願？今蒙世尊殷勤讚歎。唯願世尊，略而說之。

爾時，世尊告定自在王菩薩：諦聽！諦聽！善思念之，吾當為汝分別解說。乃往過去無量阿僧祇那由他不可說劫，爾時有佛，號一切智成就如來、應供、正徧知、明行足、善逝、世間解、無上士、調御丈夫、天人師、佛、世尊，其佛壽命六萬劫；未出家時，為小國王，與一鄰國王為友，同行十善，饒益眾生。其鄰國內所有人民，多造眾惡，二王議計，廣設方便；一王發願，早成佛道，當度是輩，令使無餘。一王發願，若不先度罪苦，令是安樂，得

至菩提，我終未願成佛。

佛告定自在王菩薩：一王發願早成佛者，即一切智成就如來是；一王發願永度罪苦眾生，未願成佛者，即地藏菩薩是。

復於過去無量阿僧祇劫，有佛出世，名清淨蓮華目如來，其佛壽命四十劫。像法之中，有一羅漢，福度眾生。因次教化，遇一女人，字曰光目，設食供養。羅漢問之：欲願何等？光目答言：我以母亡之日，資福救拔，未知我母生處何趣？羅漢愍之，為入定觀，見光目女母墮在惡趣，受極大苦。羅漢問光目言：汝母在生做何行業？今在惡趣受極大苦。光目答言：我母所習，唯好食噉魚鱉之屬；所食魚鱉，多食其子，或炒或煮，恣情食噉，計其命數，千萬復倍；尊者慈愍，如何哀救？羅漢愍之，為作方便，

勸光目言：汝可志誠念清淨蓮華目如來，兼塑畫形像，存亡獲報。

光目聞已，即捨所愛，尋畫佛像而供養之，復恭敬心，悲泣瞻禮。忽於夜後，夢見佛身金色晃耀如須彌山，放大光明，而告光目：汝母不久當生汝家，纔覺飢寒即當言說。其後家內婢生一子，未滿三日而乃言說；稽首悲泣告於光目：生死業緣，果報自受，吾是汝母，久處暗冥；自別汝來，累墮大地獄；蒙汝福力，方得受生，為下賤人，又復短命；壽年十三，更落惡道；汝有何計，令吾脫免？光目聞說，知母無疑，哽咽悲啼而白婢子：既是我母，合知本罪，作何行業，墮於惡道？婢子答言：以殺害毀罵二業受報；若非蒙福救拔吾難，以是業故未合解脫。光目問言：地獄罪報，其事云何？婢子答言：罪苦之事，不

忍稱說，百千歲中，卒白難竟。

光目聞已，啼淚號泣而白空界：願我之母永脫地獄，畢十三歲，更無重罪及歷惡道。十方諸佛慈悲愍我，聽我為母所發廣大誓願：若得我母永離三塗及斯下賤，乃至女人之身永劫不受者，願我自今日後，對清淨蓮華目如來像前，卻後百千萬億劫中，應有世界，所有地獄及三惡道諸罪苦眾生，誓願救拔，令離地獄惡趣，畜生餓鬼等，如是罪報等人，盡成佛竟，我然後方成正覺。

發誓願已，具聞清淨蓮華目如來而告之曰：光目！汝大慈愍，善能為母發如是大願。吾觀汝母十三歲畢，捨此報已，生為梵志，壽年百歲；過是報後，當生無憂國土，壽命不可計劫；後成佛果，廣度人天，數如恆河沙。佛告定自在王：爾時，羅漢福度光目者，即無盡意菩

薩是。光目母者，即解脫菩薩是。光目女者，即地藏菩薩是。過去久遠劫中，如是慈愍，發恆河沙願，廣度眾生。未來世中，若有男子女人，不行善者，行惡者，乃至不信因果者，邪淫妄語者，兩舌惡口者，毀謗大乘者，如是諸業眾生，必墮惡趣。若遇善知識，勸令一彈指間，歸依地藏菩薩，是諸眾生，即得解脫三惡道報。若能志心歸敬及瞻禮讚歎，香華衣服，種種珍寶，或復飲食，如是奉事者，未來百千萬億劫中，常在諸天受勝妙樂。若天福盡，下生人間，猶百千劫常為帝王，能憶宿命因果本末。定自在王！如是地藏菩薩有如此不可思議大威神力廣利眾生。汝等諸菩薩當記是經，廣宣流布。定自在王白佛言：世尊！願不有慮。我等千萬億菩薩摩訶薩，必能承佛威神廣演是經於閻浮提，利益眾生。定

自在王菩薩白世尊已，合掌恭敬作禮而退。

爾時，四方天王俱從座起，合掌恭敬白佛言：世尊！地藏菩薩於久遠劫來，發如是大願，云何至今猶度未絕，更發廣大誓言？唯願世尊為我等說。

佛告四天王：善哉！善哉！吾今為汝及未來現在天人眾等，廣利益故，說地藏菩薩於娑婆世界閻浮提內生死道中，慈悲救拔度脫一切罪苦眾生方便之事。四天王言：唯然，世尊！願樂欲聞。

佛告四天王：地藏菩薩久遠劫來，迄至於今，度脫眾生，猶未畢願，慈愍此世罪苦眾生。復觀未來無量劫中，因蔓不斷，以是之故，又發重願。如是菩薩於娑婆世界閻浮提中，百千萬億方便，而為教化。

四天王！地藏菩薩若遇殺生者，說宿殃短命報。若遇

竊盜者，說貧窮苦楚報。若遇邪淫者，說雀鴿鴛鴦報。若遇惡口者，說眷屬鬥諍報。若遇毀謗者，說無舌瘡口報。若遇瞋恚者，說醜陋聾殘報。若遇慳吝者，說所求違願報。若遇飲食無度者，說飢渴咽病報。若遇畋獵恣情者，說驚狂喪命報。若遇悖逆父母者，說天地災殺報。若遇燒山林木者，說狂迷取死報。若遇前後父母惡毒者，說返生鞭撻現受報。若遇網捕生雛者，說骨肉分離報。若遇毀謗三寶者，說盲聾瘡痘報。若遇輕法慢教者，說永處惡道報。若遇破用常住者，說億劫輪迴地獄報。若遇污梵誣僧者，說永在畜生報。若遇湯火斬斫傷生者，說輪迴遞償報。若遇破戒犯齋者，說禽獸飢餓報。若遇非理毀用者，說所求闕絕報。若遇吾我貢高者，說卑使下賤報。若遇兩舌鬥亂者，說無舌百舌報。若遇邪見者，說邊地受生報。

如是等閻浮提眾生，身口意業，惡習結果，百千報應，今粗略說。如是等閻浮提眾生業感差別，地藏菩薩百千方便而教化之。是諸眾生，先受如是等報，後墮地獄，動經劫數，無有出期。是故汝等護人護國，無令是諸眾業迷惑眾生。四天王聞已，涕淚悲歎合掌而退。

## 地藏菩薩本願經卷上

讚

如來慈愍 轉大法輪 婆羅門女救慈親  
覺華度迷津 摩耶夫人 請問地藏因  
南無地藏菩薩摩訶薩

三稱

## 地獄名號品第五

爾時，普賢菩薩摩訶薩白地藏菩薩言：仁者！願為天龍四眾，及未來現在一切眾生，說娑婆世界，及閻浮提罪苦眾生，所受報處，地獄名號，及惡報等事，使未來世末法眾生，知是果報。

地藏答言：仁者！我今承佛威神，及大士之力，略說地獄名號，及罪報惡報之事。仁者！閻浮提東方有山，號曰鐵圍，其山黑邃，無日月光。有大地獄，號極無間。又有地獄，名大阿鼻。復有地獄，名曰四角。復有地獄，名曰飛刀。復有地獄，名曰火箭。復有地獄，名曰夾山。復有地獄，名曰通槍。復有地獄，名曰鐵車。復有地獄，名曰鐵床。復有地獄，名曰鐵牛。復有地獄，名曰鐵衣。復有地獄，名曰千刃。復有地獄，名曰鐵驢。復有地獄，名

曰烱銅。復有地獄，名曰抱柱。復有地獄，名曰流火。復有地獄，名曰耕舌。復有地獄，名曰剗首。復有地獄，名曰燒腳。復有地獄，名曰陷眼。復有地獄，名曰鐵丸。復有地獄，名曰諍論。復有地獄，名曰鐵鉢。復有地獄，名曰多瞋。

地藏白言：仁者！鐵圍之內，有如是等地獄，其數無限。更有叫喚地獄、拔舌地獄、糞尿地獄、銅鎖地獄、火象地獄、火狗地獄、火馬地獄、火牛地獄、火山地獄、火石地獄、火床地獄、火梁地獄、火鷹地獄、鋸牙地獄、剝皮地獄、飲血地獄、燒手地獄、燒腳地獄、倒刺地獄、火屋地獄、鐵屋地獄、火狼地獄。如是等地獄，其中各各復有諸小地獄，或一或二，或三或四，乃至百千。其中名號各各不同。

地藏菩薩告普賢菩薩言：仁者！此者皆是南閻浮提行惡眾生，業感如是。業力甚大，能敵須彌，能深巨海，能障聖道。是故眾生莫輕小惡，以為無罪，死後有報，纖毫受之。父子至親，歧路各別，縱然相逢，無肯代受。我今承佛威力，略說地獄罪報之事，唯願仁者暫聽是言。普賢答言：吾已久知三惡道報，望仁者說，令後世末法一切惡行眾生，聞仁者說，使令歸佛。

地藏白言：仁者！地獄罪報，其事如是：或有地獄，取罪人舌，使牛耕之。或有地獄，取罪人心，夜叉食之。或有地獄，鑊湯盛沸，煮罪人身。或有地獄，赤燒銅柱，使罪人抱。或有地獄，使諸火燒，趁及罪人。或有地獄，一向寒冰。或有地獄，無限糞尿。或有地獄，純飛鉄鏢。或有地獄，多攢火槍。或有地獄，唯撞胸背。或有地獄，

但燒手足。或有地獄，盤絞鐵蛇。或有地獄，驅逐鐵狗。或有地獄，盡駕鐵騾。仁者！如是等報，各各獄中，有百千種業道之器，無非是銅，是鐵，是石，是火，此四種物，眾業行感。若廣說地獄罪報等事，一一獄中，更有百千種苦楚，何況多獄。我今承佛威神及仁者問，略說如是。若廣解說，窮劫不盡。

### 如來讚歎品第六

爾時，世尊舉身放大光明，徧照百千萬億恆河沙等諸佛世界，出大音聲，普告諸佛世界一切諸菩薩摩訶薩，及天、龍、鬼、神、人、非人等：聽吾今日稱揚讚歎地藏菩薩摩訶薩，於十方世界，現大不可思議威神慈悲之力，救護一切罪苦之事。吾滅度後，汝等諸菩薩大士，及天龍鬼

神等，廣作方便，衛護是經，令一切眾生證涅槃樂。說是語已，會中有一菩薩，名曰普廣，合掌恭敬而白佛言：今見世尊讚歎地藏菩薩，有如是不可思議大威神德，唯願世尊為未來世末法眾生，宣說地藏菩薩利益人天因果等事，使諸天龍八部，及未來世眾生，頂受佛語。爾時，世尊告普廣菩薩及四眾等：諦聽！諦聽！吾當為汝略說地藏菩薩利益人天福德之事。普廣白言：唯然，世尊！願樂欲聞。

佛告普廣菩薩：未來世中若有善男子善女人，聞是地藏菩薩摩訶薩名者，或合掌者、讚歎者、作禮者、戀慕者，是人超越三十劫罪。普廣！若有善男子善女人，或彩畫形像，或土石膠漆，金銀銅鐵，作此菩薩，一瞻一禮者，是人百返生於三十

三天，永不墮於惡道。假如天福盡故，下生人間，猶為國王，不失大利。若有女人厭女人身，盡心供養地藏菩薩畫像及土石膠漆銅鐵等像，如是日日不退，常以華香、飲食、衣服、繒綵、幢幡、錢、寶物等供養。是善女人，盡此一報女身，百千萬劫，更不生有女人世界，何況復受。除非慈願力故，要受女身，度脫眾生，承斯供養地藏力故，及功德力，百千萬劫不受女身。

復次，普廣！若有女人，厭是醜陋，多疾病者，但於地藏像前，志心瞻禮，食頃之間，是人千萬劫中所受生身，相貌圓滿。是醜陋女人，如不厭女身，即百千萬億生中，常為王女，乃至王妃，宰輔大姓，大長者女，端正受生，諸相圓滿。由志心故，瞻禮地藏菩薩，獲福如是。復次，普廣！若有善男子善女人，能對菩薩像前，作

諸伎樂，及歌詠讚歎，香華供養，乃至勸於一人多人。如是等輩，現在世中及未來世，常得百千鬼神日夜衛護，不令惡事輒聞其耳，何況親受諸橫。

復次，普廣！未來世中，若有惡人及惡神惡鬼，見有善男子善女人，歸敬供養讚歎瞻禮地藏菩薩形像，或妄生譏毀，謗無功德及利益事，或露齒笑，或背面非，或勸人共非，或一人非，或多人非，乃至一念生譏毀者，如是之人，賢劫千佛滅度，譏毀之報，尚在阿鼻地獄受極重罪；過是劫已，方受餓鬼；又經千劫，復受畜生；又經千劫，方得人身；縱受人身，貧窮下賤，諸根不具，多被惡業來結其心，不久之間，復墮惡道。是故，普廣！譏毀他人供養尚獲此報，何況別生惡見毀滅。

復次，普廣！若未來世，有男子女人，久處床枕，求

生求死，了不可得；或夜夢惡鬼，乃至家親，或遊險道，或多魘寐，共鬼神遊，日月歲深，轉復尪瘵，眠中叫苦，慘悽不樂者，此皆是業道論對，未定輕重，或難捨壽，或不得癒，男女俗眼，不辨是事；但當對諸佛菩薩像前，高聲轉讀此經一遍，或取病人可愛之物，或衣服寶貝、莊園舍宅，對病人前，高聲唱言：我某甲等，為是病人對經像前捨諸等物，或供養經像，或造佛菩薩形像，或造塔寺，或燃油燈，或施常住。如是三白病人，遣令聞知。假令諸識分散，至氣盡者，乃至一日、二日、三日、四日至七日已來，但高聲白，高聲讀經；是人命終之後，宿殃重罪，至于五無間罪，永得解脫，所受生處，常知宿命；何況善男子善女人，自書此經或教人書、或自塑畫菩薩形像，乃至教人塑畫。所受果報，必獲大利，是故，普廣！若見有

人讀誦是經，乃至一念讚歎是經，或恭敬者，汝須百千方便，勸是等人，勤心莫退，能得未來現在千萬億不可思議功德。

復次，普廣！若未來世諸眾生等，或夢或寐，見諸鬼神乃至諸形，或悲或啼，或愁或嘆，或恐或怖；此皆是一生十生百生千生，過去父母、男女弟妹、夫妻眷屬，在於惡趣未得出離，無處希望福力救拔，當告宿世骨肉，使作方便，願離惡道。普廣！汝以神力，遣是眷屬，令對諸佛菩薩像前，志心自讀此經，或請人讀，其數三遍或七遍；如是惡道眷屬，經聲畢是遍數，當得解脫，乃至夢寐之中，永不復見。

復次，普廣！若未來世有諸下賤等人，或奴或婢，乃至諸不自由之人，覺知宿業，要懺悔者，志心瞻禮地藏菩

薩形像，乃至一七日中，念菩薩名，可滿萬遍；如是等人盡此報後，千萬生中常生尊貴，更不經三惡道苦。

復次，普廣！若未來世中，閻浮提內，刹利、婆羅門、長者、居士、一切人等及異姓種族，有新產者，或男或女，七日之中，早與讀誦此不思議經典，更為念菩薩名，可滿萬遍；是新生子，或男或女，宿有殃報便得解脫，安樂易養，壽命增長。若是承福生者，轉增安樂及與壽命。

復次，普廣！若未來世眾生，於月一日、八日、十四日、十五日、十八日、二十三、二十四、二十八、二十九日乃至三十日，是諸日等，諸罪結集，定其輕重。南閻浮提眾生，舉止動念，無不是業，無不是罪，何況恣情殺害、竊盜、邪淫、妄語、百千罪狀。能於是十齋日，對佛菩薩諸賢聖像前，讀是經一遍，東西南北，百由旬內，無諸

災難。當此居家，若長若幼，現在未來百千歲中，永離惡趣，能於十齋日每轉一遍，現世令此居家無諸橫病，衣食豐溢。

是故，普廣！當知地藏菩薩有如是等不可說，百千萬億大威神力利益之事。閻浮眾生，於此大士有大因緣；是諸眾生，聞菩薩名，見菩薩像，乃至聞是經三字五字，或一偈一句者，現在殊妙安樂，未來之世百千萬生，常得端正，生尊貴家。

爾時，普廣菩薩聞佛如來稱揚讚歎地藏菩薩已，胡跪合掌，復白佛言：世尊！我久知是大士有如此不可思議神力，及大誓願力，為未來眾生遣知利益，故問如來，唯然頂受。世尊！當何名此經？使我云何流布？

佛告普廣：此經有三名：一名地藏本願，亦名地藏本

行，亦名地藏本誓力經。緣此菩薩，久遠劫來，發大重願，利益眾生，是故汝等依願流布。普廣聞已，合掌恭敬，作禮而退。

### 利益存亡品第七

爾時，地藏菩薩摩訶薩白佛言：世尊！我觀是閻浮眾生，舉心動念，無非是罪。脫獲善利，多退初心；若遇惡緣，念念增益。是等輩人，如履泥塗，負於重石，漸困漸重，足步深邃。若得遇知識，替與減負，或全與負；是知識有大力故，復相扶助，勸令牢腳；若達平地，須省惡路，無再經歷。

世尊！習惡眾生，從纖毫間便至無量；是諸眾生有如此習，臨命終時，父母眷屬宜為設福，以資前路；或懸旛

蓋及燃油燈；或轉讀尊經，或供養佛像及諸聖像，乃至念佛菩薩及辟支佛名字，一名一號，歷臨終人耳根，或聞在本識；是諸眾生所造惡業，計其感果，必墮惡趣，緣是眷屬為臨終人修此聖因，如是眾罪，悉皆銷滅；若能更為身死之後，七七日內，廣造眾善，能是諸眾生永離惡趣，得生人天，受勝妙樂，現在眷屬利益無量。

是故，我今對佛世尊及天龍八部、人、非人等，勸於閻浮提眾生臨終之日，慎勿殺害，及造惡緣拜祭鬼神，求諸魍魎。何以故？爾所殺害乃至拜祭，無纖毫之力利益亡人，但結罪緣，轉增深重；假使來世或現在生，得獲聖分，生人天中，緣是臨終被諸眷屬造是惡因，亦令是命終人殃累對辯，晚生善處。何況臨命終人，在生未曾有少善根，各據本業，自受惡趣，何忍眷屬更為增業。譬如有人從

遠地來，絕糧三日，所負擔物，強過百斤，忽遇鄰人，更附少物，以是之故，轉復困重。世尊！我觀閻浮眾生，但能於諸佛教中，乃至善事，一毛一滲，一沙一塵，如是利益悉皆自得。

說是語時，會中有一長者，名曰大辯，是長者久證無生，化度十方，現長者身，合掌恭敬，問地藏菩薩言：大士！是南閻浮提眾生，命終之後，小大眷屬為修功德，乃至設齋，造眾善因，是命終人得大利益及解脫否？地藏答言：長者！我今為未來現在一切眾生，承佛威力，略說是事。長者！未來現在諸眾生等，臨命終日，得聞一佛名、一菩薩名、一辟支佛名，不問有罪無罪，悉得解脫。若有男子女人，在生不修善因多造眾罪，命終之後，眷屬小大為造福利，一切聖事，七分之一而乃獲一，六分

功德，生者自利。以是之故，未來現在善男女等，聞健自修，分分己獲。無常大鬼，不期而到，冥冥遊神，未知罪福，七七日內如癡如聾；或在諸司辯論業果，審定之後，據業受生；未測之間，千萬愁苦，何況墮於諸惡趣等；是命終人，未得受生，在七七日內，念念之間，望諸骨肉眷屬，與造福力救拔；過是日後，隨業受報。若是罪人，動經千百歲中，無解脫日；若是五無間罪，墮大地獄，千劫萬劫，永受眾苦。

復次，長者！如是罪業眾生，命終之後，眷屬骨肉，為修營齋，資助業道，未齋食竟及營齋之次，米泔菜葉不棄於地，乃至諸食未獻佛僧，勿得先食。如有違食，及不精勤，是命終人，了不得力。如精勤護淨，奉獻佛僧，是命終人，七分獲一。是故，長者！閻浮眾生，若能為其父

母乃至眷屬，命終之後，設齋供養，志心勤懇；如是之人，存亡獲利。說是語時，忉利天宮，有千萬億那由他閻浮鬼神，悉發無量菩提之心，大辯長者作禮而退。

### 閻羅王眾讚歎品第八

爾時，鐵圍山內，有無量鬼王，與閻羅天子，俱詣忉利，來到佛所。所謂惡毒鬼王、多惡鬼王、大諍鬼王、白虎鬼王、血虎鬼王、赤虎鬼王、散殃鬼王、飛身鬼王、電光鬼王、狼牙鬼王、千眼鬼王、噉獸鬼王、負石鬼王、主耗鬼王、主禍鬼王、主食鬼王、主財鬼王、主畜鬼王、主禽鬼王、主獸鬼王、主魅鬼王、主產鬼王、主命鬼王、主疾鬼王、主險鬼王、三目鬼王、四目鬼王、五目鬼王、祁利失王、大祁利失王、祁利叉王、大祁利叉王、阿那吒王

、大阿那吒王，如是等大鬼王，各各與百千諸小鬼王，盡居閻浮提，各有所執，各有所主。是諸鬼王與閻羅天子，承佛威神及地藏菩薩摩訶薩力，俱詣忉利，在一面立。爾時，閻羅天子胡跪合掌白佛言：世尊！我等今者與諸鬼王，承佛威神，及地藏菩薩摩訶薩力，方得詣此忉利大會，亦是我等獲善利故。我今有小疑事，敢問世尊，唯願世尊慈悲宣說。佛告閻羅天子：恣汝所問，吾為汝說。是時，閻羅天子瞻禮世尊，及迴視地藏菩薩，而白佛言：世尊！我觀地藏菩薩在六道中，百千方便而度罪苦眾生，不辭疲倦，是大菩薩有如是不可思議神通之事。然諸眾生獲脫罪報，未久之間，又墮惡道。世尊！是地藏菩薩既有如是不可思議神力，云何眾生而不依止善道，永取解脫？唯願世尊為我解說。

佛告閻羅天子：南閻浮提眾生，其性剛強，難調難伏；是大菩薩於百千劫，頭頭救拔如是眾生，早令解脫。是罪報人，乃至墮大惡趣，菩薩以方便力，拔出根本業緣，而遣悟宿世之事。自是閻浮眾生結惡習重，旋出旋入，勞斯菩薩久經劫數而作度脫。

譬如有人迷失本家，誤入險道。其險道中，多諸夜叉及虎狼獅子、虵蛇蝮蠍，如是迷人，在險道中，須臾之間，即遭諸毒。有一知識多解大術，善禁是毒乃及夜叉諸惡毒等。忽逢迷人欲進險道，而語之言：咄哉男子！為何事故而入此路？有何異術，能制諸毒？是迷路者忽聞是語，方知險道，即便退步，求出此路。是善知識，提攜接手，引出險道，免諸惡毒，至於好道，令得安樂，而語之言：咄哉迷人！自今以後，勿履是道，此路入者，卒難得出，

復損性命。是迷路者亦生感重。臨別之時，知識又言：若見親知及諸路人，若男若女，言於此路多諸毒惡，喪失性命無令是眾自取其死。

是故，地藏菩薩具大慈悲，救拔罪苦眾生，生人天中，令受妙樂。是諸罪眾，知業道苦，脫得出離，永不再歷。如迷路者誤入險道，遇善知識引接令出，永不復入；逢見他人，復勸莫入，自言：因是迷故，得解脫竟，更不復入。若再履踐，猶尚迷誤，不覺舊曾所落險道，或致失命，如墮惡趣，地藏菩薩方便力故，使令解脫，生人天中，旋又再入，若業結重，永處地獄，無解脫時。

爾時，惡毒鬼王合掌恭敬白佛言：世尊！我等諸鬼王，其數無量，在閻浮提，或利益人，或損害人，各各不同。然是業報，使我眷屬遊行世界，多惡少善。過人家庭，

或城邑聚落，莊園房舍，或有男子女人，修毛髮善事，乃至懸一旛一蓋，少香少華，供養佛像及菩薩像，或轉讀尊經，燒香供養一句一偈。我等鬼王敬禮是人，如過去現在未來諸佛；敕諸小鬼，各有大力及土地分，便令衛護，不令惡事橫事、惡病橫病，乃至不如意事，近於此舍等處，何況入門。

佛讚鬼王：善哉！善哉！汝等及與閻羅，能如是擁護善男女等，吾亦告梵王帝釋，令衛護汝。

說是語時，會中有一鬼王，名曰主命，白佛言：世尊！我本業緣，主閻浮人命，生時死時，我皆主之。在我本願，甚欲利益。自是眾生不會我意，致令生死俱不得安。何以故？是閻浮提人，初生之時，不問男女，或欲生時，但作善事增益舍宅，自令土地無量歡喜，擁護子母，得大

安樂，利益眷屬。或已生下，慎勿殺害，取諸鮮味供給產母，及廣聚眷屬，飲酒食肉，歌樂絃管，能令子母不得安樂。何以故？是產難時，有無數惡鬼及魍魎精魅欲食腥血。是我早令舍宅土地靈祇荷護子母，使令安樂而得利益。如是之人，見安樂故，便合設福，答諸土地，翻為殺害，聚集眷屬，以是之故，犯殃自受，子母俱損。

又閻浮提臨命終人，不問善惡，我欲令是命終之人不落惡道，何況自修善根增我力故。是閻浮提行善之人，臨命終時，亦有百千惡道鬼神，或變作父母乃至諸眷屬，引接亡人，令落惡道，何況本造惡者。世尊！如是閻浮提男子女人臨命終時，神識惛昧，不辨善惡，乃至眼耳更無見聞，是諸眷屬，當須設大供養，轉讀尊經，念佛菩薩名號；如是善緣，能令亡者離諸惡道，諸魔鬼神悉皆退散。

世尊！一切眾生臨命終時，若得聞一佛名，一菩薩名，或大乘經典一句一偈，我觀如是輩人，除五無間殺害之罪，小小惡業合墮惡趣者尋即解脫。

佛告主命鬼王：汝大慈故，能發如是大願，於生死中護諸眾生；若未來世中，有男子女人至生死時，汝莫退是願，總令解脫，永得安樂。鬼王白佛言：願不有慮，我畢是形，念念擁護閻浮眾生，生時死時俱得安樂；但願諸眾生於生死時，信受我語，無不解脫獲大利益。

爾時，佛告地藏菩薩：是大鬼王主命者，已曾經百千生作大鬼王，於生死中擁護眾生。是大士慈悲願故，現大鬼身，實非鬼也；卻後過一百七十劫當得成佛，號曰無相如來，劫名安樂，世界名淨住，其佛壽命不可計劫。地藏！是大鬼王，其事如是不可思議，所度人天亦不可限量。

## 稱佛名號品第九

爾時，地藏菩薩摩訶薩白佛言：世尊！我今為未來眾生演利益事，於生死中得大利益，唯願世尊聽我說之。佛告地藏菩薩：汝今欲興慈悲，救拔一切罪苦六道眾生，演不思議事，今正是時，唯當速說；吾即涅槃，使汝早畢是願，吾亦無憂現在未來一切眾生。

地藏菩薩白佛言：世尊！過去無量阿僧祇劫，有佛出世，號無邊身如來；若有男子女人聞是佛名，暫生恭敬，即得超越四十劫生死重罪；何況塑畫形像，供養讚歎，其人獲福無量無邊。

又於過去恆河沙劫，有佛出世，號寶性如來；若有男子女人聞是佛名，一彈指頃，發心歸依，是人於無上道，永不退轉。

又於過去有佛出世，號波頭摩勝如來；若有男子女人聞是佛名，歷於耳根，是人當得千返生於六欲天中，何況志心稱念。

又於過去不可說不可說阿僧祇劫，有佛出世，號師子吼如來；若有男子女人聞是佛名，一念歸依，是人得遇無量諸佛，摩頂授記。

又於過去有佛出世，號拘留孫佛；若有男子女人聞是佛名，志心瞻禮，或復讚歎，是人於賢劫千佛會中，為大梵王，得授上記。

又於過去有佛出世號毘婆尸佛；若有男子女人聞是佛名，永不墮惡道，常生人天，受勝妙樂。

又於過去無量無數恆河沙劫，有佛出世，號寶勝如來；若有男子女人聞是佛名，畢竟不墮惡道，常在天上受勝

妙樂。

又於過去有佛出世，號寶相如來；若有男子女人聞是佛名，生恭敬心，是人不久得阿羅漢果。

又於過去無量阿僧祇劫，有佛出世，號袈裟幢如來；若有男子女人聞是佛名者，超一百大劫生死之罪。

又於過去有佛出世，號大通山王如來；若有男子女人聞是佛名者，是人得遇恆河沙佛，廣為說法，必成菩提。

又於過去有淨月佛、山王佛、智勝佛、淨名王佛、智成就佛、無上佛、妙聲佛、滿月佛、月面佛，有如是等不可說佛。

世尊！現在未來一切眾生，若天若人，若男若女，但念得一佛名號，功德無量，何況多名！是眾生等，生時死時，自得大利，終不墮惡道。若有臨命終人，家中眷屬，

乃至一人，為是病人，高聲念一佛名，是命終人，除五無  
間罪，餘業報等，悉得銷滅。是五無間罪，雖至極重，動  
經億劫，了不得出，承斯臨命終時，他人為其稱念佛名，  
於是罪中，亦漸銷滅；何況眾生自稱自念，獲福無量，滅  
無量罪。

### 地藏菩薩本願經卷中

讚

普賢啟問 地藏宏開 三塗六道絕塵埃

普廣問如來 授記十齋 接引上蓮臺

南無地藏菩薩摩訶薩 三稱

## 校量布施功德緣品第十

爾時，地藏菩薩摩訶薩承佛威神，從座而起，胡跪合掌，白佛言：世尊！我觀業道眾生，校量布施，有輕有重，有一生受福，有十生受福，有百生千生受大福利者。是事云何？唯願世尊為我說之。

爾時，佛告地藏菩薩：吾今於忉利天宮一切眾會，說閻浮提布施校量功德輕重，汝當諦聽！吾為汝說。地藏白佛言：我疑是事，願樂欲聞。

佛告地藏菩薩：南閻浮提，有諸國王、宰輔大臣、大長者、大剎利、大婆羅門等，若遇最下貧窮，乃至癡殘瘖瘂，聾癡無目，如是種種不具者；是大國王等欲布施時，若能具大慈悲，下心含笑，親手徧布施，或使人施，軟言慰諭；是國王等所獲福利，如布施百恆河沙佛功德之利

。何以故？緣是國王等，於是最貧賤輩及不完具者，發大慈心，是故福利有如此報，百千生中，常得七寶具足，何況衣食受用。

復次，地藏！若未來世，有諸國王至婆羅門等，遇佛塔寺或佛形像，乃至菩薩、聲聞、辟支佛像，躬自營辦，供養布施；是國王等，當得三劫為帝釋身，受勝妙樂；若能以此布施福利，迴向法界，是大國王等，於十劫中，常為大梵天王。

復次，地藏！若未來世，有諸國王至婆羅門等，遇先佛塔廟或至經像，毀壞破落，乃能發心修補；是國王等，或自營辦，或勸他人乃至百千人等，布施結緣；是國王等，百千生中常為轉輪王身；如是他人同布施者，百千生中常為小國王身；更能於塔廟前發迴向心，如是國王乃及諸

人，盡成佛道，以此果報無量無邊。

復次，地藏！未來世中，有諸國王及婆羅門等，見諸老病及生產婦女，若一念間具大慈心，布施醫藥、飲食、臥具，使令安樂；如是福利最不思議，一百劫中常為淨居天主；二百劫中常為六欲天主；畢竟成佛，永不墮惡道，乃至百千生中，耳不聞苦聲。

復次，地藏！若未來世中，有諸國王及婆羅門等，能作如是布施，獲福無量；更能迴向，不問多少，畢竟成佛，何況釋梵轉輪之報。是故，地藏！普勸眾生當如是學。

復次，地藏！未來世中，若善男子善女人，於佛法中種少善根，毛髮沙塵等許，所受福利不可為喻。

復次，地藏！未來世中，若有善男子善女人，遇佛形像、菩薩形像、辟支佛形像、轉輪王形像，布施供養，得

無量福，常在人天受勝妙樂；若能迴向法界，是人福利不可為喻。

復次，地藏！未來世中，若有善男子善女人，遇大乘經典，或聽聞一偈一句，發殷重心，讚歎恭敬，布施供養，是人獲大果報，無量無邊；若能迴向法界，其福不可為喻。

復次，地藏！若未來世中，有善男子善女人，遇佛塔寺、大乘經典，新者，布施供養，瞻禮讚歎，恭敬合掌；若遇故者，或毀壞者，修補營理，或獨發心，或勸多人同共發心，如是等輩，三十生中常為諸小國王，檀越之人常為輪王，還以善法教化諸小國王。

復次，地藏！未來世中，若有善男子善女人，於佛法中所種善根，或布施供養，或修補塔寺，或裝理經典，乃

至一毛一塵，一沙一滯；如是善事，但能迴向法界，是人功德，百千生中受上妙樂，如但迴向自家眷屬，或自身利益，如是之果，即三生受樂，捨一得萬報。是故，地藏！布施因緣，其事如是。

### 地神護法品第十一

爾時，堅牢地神白佛言：世尊！我從昔來，瞻視頂禮無量菩薩摩訶薩，皆是大不可思議神通智慧，廣度眾生；是地藏菩薩摩訶薩，於諸菩薩，誓願深重。世尊！是地藏菩薩，於閻浮提，有大因緣，如文殊、普賢、觀音、彌勒，亦化百千身形，度於六道，其願尚有畢竟；是地藏菩薩，教化六道一切眾生，所發誓願劫數，如千百億恆河沙。世尊！我觀未來及現在眾生，於所住處，於南方清潔

之地，以土石竹木作其龕室，是中能塑畫，乃至金銀銅鐵，作地藏形像，燒香供養，瞻禮讚歎，是人居處即得十種利益。

何等為十？一者，土地豐壤；二者，家宅永安；三者，先亡生天；四者，現存益壽；五者，所求遂意；六者，無水火災；七者，虛耗辟除；八者，杜絕惡夢；九者，出入神護；十者，多遇聖因。世尊！未來世中及現在眾生，若能於所住處方面，作如是供養，得如是利益。復白佛言：世尊！未來世中，若有善男子善女人，於所住處，有此經典及菩薩像，是人更能轉讀經典，供養菩薩；我常日夜，以本神力衛護是人，乃至水火盜賊，大橫小橫，一切惡事，悉皆銷滅。

佛告堅牢地神：汝大神力，諸神少及，何以故？閻浮

土地悉蒙汝護，乃至草木沙石，稻麻竹葦，穀米寶貝，從地而有，皆因汝力，又常稱揚地藏菩薩利益之事，汝之功德及以神通，百千倍於常分地神。

若未來世中，有善男子善女人，供養菩薩及轉讀是經，但依地藏本願經一事修行者，汝以本神力而擁護之，勿令一切災害及不如意事，輒聞於耳，何況令受！非但汝獨護是人故，亦有釋梵眷屬、諸天眷屬，擁護是人。何故得如是聖賢擁護？皆由瞻禮地藏形像及轉讀是本願經故，自然畢竟出離苦海，證涅槃樂，以是之故得大擁護。

## 見聞利益品第十二

爾時，世尊從頂門上放百千萬億大毫相光，所謂白毫相光、大白毫相光、瑞毫相光、大瑞毫相光、玉毫相光、

大玉毫相光、紫毫相光、大紫毫相光、青毫相光、大青毫相光、碧毫相光、大碧毫相光、紅毫相光、大紅毫相光、綠毫相光、大綠毫相光、金毫相光、大金毫相光、慶雲毫相光、大慶雲毫相光、千輪毫光、大千輪毫光、寶輪毫光、大寶輪毫光、日輪毫光、大日輪毫光、月輪毫光、大月輪毫光、宮殿毫光、大宮殿毫光、海雲毫光、大海雲毫光。於頂門上，放如是等毫相光已，出微妙音，告諸大眾天龍八部、人、非人等：聽吾今日於忉利天宮，稱揚讚歎地藏菩薩於人天中，利益等事、不思議事、超聖因事、證十地事、畢竟不退阿耨多羅三藐三菩提事。

說是語時，會中有一菩薩摩訶薩，名觀世音，從座而起，胡跪合掌白佛言：世尊！是地藏菩薩摩訶薩，具大慈悲，憐愍罪苦眾生，於千萬億世界化千萬億身；所有功德

及不思議威神之力，我聞世尊與十方無量諸佛，異口同音讚歎地藏菩薩云：正使過去現在未來諸佛說其功德，猶不能盡。向者，又蒙世尊普告大眾，欲稱揚地藏利益等事；唯願世尊，為現在未來一切眾生，稱揚地藏不思議事，令天龍八部瞻禮獲福。

佛告觀世音菩薩：汝於娑婆世界有大因緣，若天若龍、若男若女、若神若鬼，乃至六道罪苦眾生，聞汝名者、見汝形者、戀慕汝者、讚歎汝者，是諸眾生，於無上道，必不退轉，常生人天，具受妙樂，因果將熟，遇佛授記。汝今具大慈悲，憐愍眾生及天龍八部，聽吾宣說地藏菩薩不思議利益之事，汝當諦聽，吾今說之。觀世音言：唯然，世尊！願樂欲聞。

佛告觀世音菩薩：未來現在諸世界中，有天人受天福

盡，有五衰相現，或有墮於惡道之者；如是天人若男若女，當現相時，或見地藏菩薩形像，或聞地藏菩薩名，一瞻一禮，是諸天人，轉增天福，受大快樂，永不墮三惡道報；何況見聞菩薩，以諸香華、衣服、飲食、寶貝、瓔珞，布施供養，所獲功德福利，無量無邊。

復次，觀世音！若未來現在諸世界中，六道眾生臨命終時，得聞地藏菩薩名，一聲歷耳根者，是諸眾生，永不歷三惡道苦；何況臨命終時，父母眷屬將是命終人舍宅、財物、寶貝、衣服，塑畫地藏形像；或使病人未終之時，眼耳見聞，知道眷屬將舍宅、寶貝等，為其自身塑畫地藏菩薩形像；是人若是業報，合受重病者，承斯功德，尋即除癒，壽命增益；是人若是業報命盡，應有一切罪障業障，合墮惡趣者，承斯功德，命終之後，即生人天，受勝妙

樂，一切罪障悉皆銷滅。

復次，觀世音菩薩！若未來世，有男子女人，或乳哺時，或三歲五歲、十歲以下，亡失父母乃及亡失兄弟姊妹，是人年既長大，思憶父母及諸眷屬，不知落在何趣？生何世界？生何天中？是人若能塑畫地藏菩薩形像，乃至聞名，一瞻一禮，一日至七日，莫退初心，聞名見形，瞻禮供養；是人眷屬，假因業故，墮惡趣者，計當劫數，承斯男女兄弟姊妹塑畫地藏形像，瞻禮功德，尋即解脫，生人天中，受勝妙樂。是人眷屬，如有福力，已生人天，受勝妙樂者，即承斯功德，轉增聖因，受無量樂。是人更能三七日中，一心瞻禮地藏形像，念其名字，滿於萬遍，當得菩薩現無邊身，具告是人眷屬生界；或於夢中，菩薩現大神力，親領是人，於諸世界，見諸眷屬。更能每日念菩薩

名千遍，至於千日，是人當得菩薩遣所在土地鬼神，終身衛護，現世衣食豐溢，無諸疾苦，乃至橫事不入其門，何況及身！是人畢竟得菩薩摩頂授記。

復次，觀世音菩薩！若未來世，有善男子善女人，欲發廣大慈心，救度一切眾生者、欲修無上菩提者、欲出離三界者，是諸人等，見地藏形像及聞名者，至心歸依，或以香華、衣服、寶貝、飲食、供養瞻禮，是善男女等，所願速成，永無障礙。

復次，觀世音！若未來世，有善男子善女人，欲求現在未來百千萬億等願、百千萬億等事，但當歸依、瞻禮、供養、讚歎地藏菩薩形像，如是所願所求，悉皆成就。復願地藏菩薩，具大慈悲，永擁護我，是人於睡夢中，即得菩薩摩頂授記。

復次，觀世音菩薩！若未來世，善男子善女人，於大乘經典深生珍重，發不思議心，欲讀欲誦，縱遇明師，教視令熟，旋得旋忘，動經年月，不能讀誦；是善男子等，有宿業障，未得消除，故於大乘經典，無讀誦性；如是之人，聞地藏菩薩名，見地藏菩薩像，具以本心恭敬陳白，更以香華、衣服、飲食、一切玩具，供養菩薩；以淨水一盞，經一日一夜，安菩薩前，然後合掌請服，迴首向南，臨入口時，至心鄭重，服水既畢，慎五辛、酒肉、邪淫、妄語，及諸殺害，一七日或三七日，是善男子善女人，於睡夢中，具見地藏菩薩現無邊身，於是人處，授灌頂水。其人夢覺，即獲聰明，應是經典，一歷耳根，即當永記，更不忘失一句一偈。

復次，觀世音菩薩！若未來世有諸人等，衣食不足，

求者乖願；或多病疾，或多兇衰；家宅不安，眷屬分散；或諸橫事，多來忤身；睡夢之間，多有驚怖；如是人等，聞地藏名，見地藏形，至心恭敬，念滿萬遍；是諸不如意事，漸漸消滅，即得安樂、衣食豐溢，乃至於睡夢中，悉皆安樂。

復次，觀世音菩薩！若未來世，有善男子善女人，或因治生，或因公私，或因生死，或因急事入山林中，過渡河海乃及大水，或經險道；是人先當念地藏菩薩名萬遍，所過土地，鬼神衛護，行住坐臥，永保安樂；乃至逢於虎狼獅子，一切毒害不能損之。

佛告觀世音菩薩：是地藏菩薩，於閻浮提有大因緣，若說於諸眾生見聞利益等事，百千劫中說不能盡。是故，觀世音！汝以神力流布是經，令娑婆世界眾生，百千萬劫

永受安樂。爾時，世尊而說偈言：

吾觀地藏威神力，恆河沙劫說難盡，  
見聞瞻禮一念間，利益人天無量事。  
若男若女若龍神，報盡應當墮惡道，  
至心歸依大士身，壽命轉增除罪障。  
少失父母恩愛者，未知魂神在何趣，  
兄弟姊妹及諸親，生長已來皆不識，  
或塑或畫大士身，悲戀瞻禮不暫捨，  
三七日中念其名，菩薩當現無邊體，  
示其眷屬所生界，縱墮惡趣尋出離，  
若能不退是初心，即獲摩頂授聖記，  
欲修無上菩提者，乃至出離三界苦，  
是人既發大悲心，先當瞻禮大士像，

一切諸願速成就，永無業障能遮止。  
有人發心念經典，欲度群迷超彼岸，  
雖立是願不思議，旋讀旋忘多廢失。  
斯人有業障惑故，於大乘經不能記，  
供養地藏以香華，衣服飲食諸玩具，  
以淨水安大士前，一日一夜求服之，  
發殷重心慎五辛，酒肉邪淫及妄語，  
三七日內勿殺害，至心思念大士名，  
即於夢中見無邊，覺來便得利根耳，  
應是經教歷耳聞，千萬生中永不忘，  
以是大士不思議，能使斯人獲此慧。  
貧窮眾生及疾病，家宅兇衰眷屬離，  
睡夢之中悉不安，求者乖違無稱遂。

至心瞻禮地藏像，一切惡事皆消滅，  
至於夢中盡得安，衣食豐饒神鬼護，  
欲入山林及渡海，毒惡禽獸及惡人，  
惡神惡鬼并惡風，一切諸難諸苦惱，  
但當瞻禮及供養，地藏菩薩大士像，  
如是山林大海中，應是諸惡皆消滅，  
觀音至心聽吾說，地藏無盡不思議，  
百千萬劫說不周，廣宣大士如是力，  
地藏名字人若聞，乃至見像瞻禮者，  
香華衣服飲食奉，供養百千受妙樂，  
若能以此迴法界，畢竟成佛超生死，  
是故觀音汝當知，普告恆沙諸國土。

### 囑累人天品第十三

爾時，世尊舉金色臂，又摩地藏菩薩摩訶薩頂，而作是言：地藏！地藏！汝之神力不可思議，汝之慈悲不可思議，汝之智慧不可思議，汝之辯才不可思議，正使十方諸佛，讚歎宣說汝之不思議事，千萬劫中不能得盡。

地藏！地藏！記吾今日在忉利天中，於百千萬億不可說不可說一切諸佛菩薩、天龍八部大會之中，再以人天諸眾生等，未出三界在火宅中者，付囑於汝，無令是諸眾生，墮惡趣中一日一夜，何況更落五無間及阿鼻地獄，動經千萬億劫無有出期。

地藏！是南閻浮提眾生，志性無定，習惡者多，縱發善心，須臾即退，若遇惡緣，念念增長；以是之故，吾分是形，百千億化度，隨其根性而度脫之。

地藏！吾今殷勤以天人眾，付囑於汝，未來之世，若有天人及善男子善女人，於佛法中，種少善根，一毛一塵一沙一滯，汝以道力，擁護是人，漸修無上，勿令退失。復次，地藏！未來世中，若天若人，隨業報應落在惡趣；臨墮趣中，或至門首，是諸眾生，若能念得一佛名、一菩薩名、一句一偈大乘經典，是諸眾生，汝以神力方便救拔，於是人所，現無邊身，為碎地獄，遣令生天，受勝妙樂。

爾時，世尊而說偈言：

現在未來天人眾，吾今殷勤付囑汝，  
以大神通方便度，勿令墮在諸惡趣。

爾時，地藏菩薩摩訶薩胡跪合掌白佛言：世尊！唯願世尊不以為慮。未來世中，若有善男子善女人，於佛法中

一念恭敬，我亦百千方便，度脫是人，於生死中速得解脫；何況聞諸善事，念念修行，自然於無上道，永不退轉。說是語時，會中有一菩薩，名虛空藏，白佛言：世尊！我自至忉利，聞於如來讚歎地藏菩薩，威神勢力，不可思議。未來世中，若有善男子善女人，乃至一切天龍，聞此經典及地藏菩薩名字，或瞻禮形像，得幾種福利？唯願世尊，為未來現在一切眾等，略而說之。

佛告虛空藏菩薩：諦聽諦聽！吾當為汝分別說之：若未來世，有善男子善女人，見地藏形像及聞此經，乃至讀誦，香華飲食、衣服珍寶，布施供養，讚歎瞻禮，得二十八種利益：一者，天龍護念；二者，善果日增；三者，集聖上因；四者，菩提不退；五者，衣食豐足；六者，疾疫不臨；七者，離水火災；八者，無盜賊厄；九者，人見欽

敬；十者，神鬼助持；十一者，女轉男身；十二者，為王臣女；十三者，端正相好；十四者，多生天上；十五者，或為帝王；十六者，宿智命通；十七者，有求皆從；十八者，眷屬歡樂；十九者，諸橫銷滅；二十者，業道永除；二十一者，去處盡通；二十二者，夜夢安樂；二十三者，先亡離苦；二十四者，宿福受生；二十五者，諸聖讚歎；二十六者，聰明利根；二十七者，饒慈愍心；二十八者，畢竟成佛。

復次，虛空藏菩薩！若現在未來，天龍鬼神，聞地藏名，禮地藏形，或聞地藏本願事行，讚歎瞻禮，得七種利益：一者，速超聖地；二者，惡業銷滅；三者，諸佛護臨；四者，菩提不退；五者，增長本力；六者，宿命皆通；七者，畢竟成佛。

爾時，十方一切諸來不可說不可說諸佛如來及大菩薩、天龍八部，聞釋迦牟尼佛稱揚讚歎地藏菩薩大威神力不可思議，歎未曾有。是時，忉利天雨無量香華、天衣珠瓔，供養釋迦牟尼佛及地藏菩薩已，一切眾會，俱復瞻禮，合掌而退。

### 地藏菩薩本願經卷下

讚

地藏本誓 校量經因 癡殘瘖啞是前生

今世諷大乘 福利無窮 決定寶蓮生

南無地藏菩薩摩訶薩

三稱

補闕真言

𑖀	𑖂	𑖄	𑖆	𑖈	𑖊	𑖌	𑖎	𑖐	𑖒
Nang	Ma-oh	Ra	Ta	Nang	Ta-ra	Ya-ahr	Ya	Kaha	Ra-ahr
曩	謨	囉	怛	曩	哆囉	夜	耶	佉	囉
𑖔	𑖖	𑖘	𑖚	𑖜	𑖞	𑖠	𑖢	𑖤	𑖧
Kaha	Ra-ahr	Ka-ou	Jia-ou	Ka-ou	Jia-ou	Ma-oh	Ra	Ma-oh	Ra
佉	囉	俱	住	俱	住	摩	囉	摩	囉
𑖩	𑖫	𑖭	𑖯	𑖱	𑖳	𑖵	𑖷	𑖹	𑖻
Ha-ou	Ra-ahr	Ha-wu-anm	Ha	Ha	Sa-ou	Ta	Nang	Ha-wu-anm	Par
虎	囉	吽	賀	賀	蘇	怛	曩	吽	潑
			𑖽	𑖿	𑗁	𑗃			
			Ma-ou	Na	Sa-va-ahr	Ha-ahr			
			母	拏	薩嚩	訶			

地藏菩薩本願經

補闕圓滿真言

𑗅	𑗇	𑗉	𑗋	𑗍	𑗏	𑗑	𑗓	𑗕
O-anm	Daha-ou	Ra-ou	Daha-ou	Ra-ou	Jia-eh	Ya-eh	Ma-ou	Ka-eh
喻	都呼	嚕	都呼	嚕	皆	吽	母	契
					𑗗	𑗙		
					Sa-va-ahr	Ha-ahr		
					薩嚩	訶		

普迴向真言

𑗅	𑗇	𑗉	𑗋	𑗍	𑗏	𑗑	𑗓	𑗕
O-anm	Sa-paha	Ra	Sa-paha	Ra	Va-ee	Ma	Nang	Sa-ahr
喻	娑頗	囉	娑頗	囉	微	摩	曩	娑
					𑗗	𑗙	𑗛	𑗝
					Ma	Ha-ahr	Jia-anm	Va
					摩	訶	堅	嚩
								𑗟
								吽

南無大願地藏菩薩

𑖀 𑖂𑖄 𑖂𑖄 𑖂𑖄 𑖂𑖄 𑖂𑖄 𑖂𑖄 𑖂𑖄

Nang Ma-oh Ha Ha Ha Va-ee Sa-ma Ya-eh  
曩 謨 訶 訶 訶 微 三嘛 耶

𑖂𑖄 𑖂𑖄 𑖂𑖄 𑖂𑖄 𑖂𑖄 𑖂𑖄 𑖂𑖄

Ah Va-ee Ra Ha-wu-anm Kaha-anm Sa-va-ahr Ha-ahr  
啊 微 囉 吽 刊 薩嘑 訶

滅定業真言

𑖂𑖄 𑖂𑖄 𑖂𑖄 𑖂𑖄 𑖂𑖄 𑖂𑖄 𑖂𑖄 𑖂𑖄

O-anm Par Ra Ma-ou Nang-ee Daha Nang-lalelue Sa-va-ahr Ha-ahr  
喻 鉢 囉 末 鄰 陀 寧 薩嘑 訶

地藏菩薩真言

𑖀 𑖂𑖄 𑖂𑖄 𑖂𑖄 𑖂𑖄 𑖂𑖄 𑖂𑖄 𑖂𑖄

Nang Ma-oh Sa-anm Ma Nang-ta Ba-ou Dahr-daha-ahr Nang-ahr-anm  
曩 謨 三 滿 多 菩 馱 喃

𑖂𑖄 𑖂𑖄 𑖂𑖄 𑖂𑖄 𑖂𑖄 𑖂𑖄 𑖂𑖄 𑖂𑖄

Ha Ha Ha Sa-ou Ta Nang-ou Sa-va-ahr Ha-ahr  
訶 訶 訶 素 怛 弩 薩嘑 訶

迴向偈

誦經功德殊勝行  
無邊勝福皆迴向  
願消三障諸煩惱  
願得智慧真明瞭  
普願災障悉消除  
世世常行菩薩道

南無大願地藏王菩薩

發願迴向偈

藕益大師

誓願以身心	隨於剎塵劫	普代眾生苦	劫石或可移	我所脩福業	種種勝善根	一一皆迴向	悉願證真常	深願地藏勝法輪	一切時中無稍停	有緣得觸大士光
供養地藏王	永處眾苦中	令得先成佛	此願終不改	懺悔發宏願	體性同法界	普施諸含識	同歸寂光土	徧轉十方一切處	祥光大放聖法炬	千百祈求滿賜予

聞名瞻禮及讚揚  
病得健全飢得糧  
刀兵水火諸殃除  
末法時中最適需  
願將此冊作慈航  
助印咸皆立大功  
念念不忘大士名  
等為迴向大菩提

妙供傾誠受惠鉅  
卑微升進貧饒裕  
入聖超凡廣啟悟  
百千萬劫難遭遇  
生死海中齊拔苦  
流通宣演諸福至  
到處神靈樂擁護  
三界同超登寶所

# 百千頌大集經地藏菩薩請問法身讚

開府儀同三司特進試鴻臚卿肅國公食邑三千戶賜紫贈

司空謚大鑿正號大廣智大興善寺三藏沙門不空奉詔譯

歸命禮法身	住於諸有情	彼由不徧知	輪迴於三有
其性即生死	淨時亦復然	清淨是涅槃	亦即是法身
譬如乳相雜	醍醐不可得	如煩惱相雜	法界不可見
譬如淨乳已	酥精妙無垢	如淨其煩惱	法界極清淨
如燈在其瓶	光耀無所有	如在煩惱瓶	法界不照耀
彼彼令一邊	其瓶若得穴	由彼彼一邊	光明而外出
以三摩地杵	破壞煩惱瓶	徧滿於虛空	普徧光照耀
法界亦不生	亦不曾壞滅	一切時不染	初中常無垢
譬如吠琉璃	常時極光明	石藏以覆蔽	彼光不照耀
如是煩惱覆	法界妙清淨	不照於生死	於涅槃光明

有性若有功 則見於真金 無性若有功 困而無所獲  
如糠覆其上 不名為粳米 煩惱覆其上 亦不名為佛  
若得離於糠 顯現於粳米 遠離於煩惱 法身得顯現  
世間作譬喻 芭蕉無堅實 而有真實果 食味如甘露  
如無實生死 流轉煩惱海 其果即佛體 甘露施有情  
如是於諸種 相似生其果 無種亦無果 智者必不信  
種子則其性 諸法之所依 次第若能淨 獲得成佛位  
日月常無垢 以五種覆蔽 雲霧與煙等 羅睺手及塵  
如是心光明 覆蔽以五垢 貪愛瞋恚眠 掉舉與疑惑  
如火洗其衣 種種垢不淨 若擲於火中 燒垢不燒衣  
空類諸契經 所有如來說 一切斷煩惱 不曾壞其性  
譬如地下水 常住而清淨 智隱於煩惱 清淨亦復然  
法界亦非我 非女亦非男 遠離一切執 云何分別我

諸法無所著	女男不可得	貪盲調伏故	示現男女相
無常苦空性	心淨慮有三	最勝心淨慮	諸法無自性
如胞胎孕子	有之而不現	如煩惱所覆	法實不可見
分別有四種	所生大造者	分別我我所	名想及境界
一切佛大願	無所有無相	自覺相應故	諸佛常法性
如言兔有角	分別而非有	如是一切法	分別不可得
分析如微塵	分別不可得	如初後亦爾	智云何分別
如是和合生	和合亦滅壞	一法自不生	云何愚分別
兔牛二角喻	此名徧計相	依住於中道	如善逝法性
如月及星宿	現於清水器	影像而顯現	如是圓成相
初中亦為善	常恒不欺誑	彼無五種我	云何我分別
譬如熱時水	故名為熱水	是則其冷時	則名為冷水
覆蔽煩惱網	是則名為心	若離其煩惱	則名為等覺

眼識緣於色 影像極清淨 不生亦不滅 法界如是知  
耳識緣於聲 清淨識三種 以自分別聞 法界無形相  
鼻依香而嗅 無色亦無形 鼻識是真如 法界應分別  
舌界自性空 味界性遠離 無依亦無識 法界自性故  
清淨身自性 所觸和合相 遠離於所緣 我說為法界  
諸法意為最 離能所分別 法界無自性 法界而分別  
能見聞而嗅 是味及所觸 瑜伽法是知 如是圓成相  
眼耳及與鼻 舌身及末那 六處皆清淨 如是彼之相  
心見有二種 世間出世間 我執為流轉 自覺是真如  
無盡是涅槃 若盡貪及癡 覺彼是佛體 有情歸依處  
一切於此身 有智及無智 繫縛自分別 由悟得解脫  
菩提不遠近 不來亦不去 壞滅及顯現 於此煩惱網  
說於眾契經 住於自思惟 照以智慧燈 即得最勝寂

菩提不遠想	亦無鄰近想	是六境影像	皆由如是知
如水與乳合	同在於一器	鵝飲盡其乳	其水如常在
如是煩惱雜	智在於一器	瑜伽者飲智	棄捨於煩惱
如是我我執	乃至所取執	若見二無我	有種而滅壞
是佛般涅槃	常恒淨無垢	愚夫二分別	無二瑜伽句
種種難行施	以戒攝有情	一切損忍辱	界增此為三
於諸法精進	靜慮心加行	常習於智慧	復得菩提增
方便共為慧	以願皆清淨	以力妙堅智	界增為四種
不應禮菩薩	此為甚惡說	不親於菩薩	不生其法身
增於甘蔗種	欲食於石蜜	若壞甘蔗種	無由石蜜生
若護甘蔗種	三種而可得	糖半糖石蜜	於中必得生
若護菩提心	三種而可得	羅漢緣覺佛	於中必得生
如護於稻芽	農夫必當護	如初勝解行	如來必作護

如黑十五日 而見月輪形 如是勝解行 影現佛形相  
如是初月輪 剎那剎那增 如是入地者 念念見增益  
如白十五日 月輪得圓滿 如是究竟地 法身而得生  
勝解彼堅固 常當於佛法 能發如是心 得為不退轉  
染依得轉依 得受為淨依 由分得覺悟 名為極喜地  
常時於染污 欲等種種垢 無垢得清淨 名為離垢地  
滅壞煩惱網 照耀得離垢 無量之暗暝 離名發光地  
清淨常光明 遠離世吉祥 圍繞智慧焰 名為焰慧地  
一切明工技 種種靜慮飾 難勝於煩惱 得勝難勝地  
於三種菩提 攝受令成就 生滅於甚深 名為現前地  
遊戲於光網 徧以帝釋嚴 超越欲暴流 名為遠行地  
一切佛加持 預入於智海 自在無功用 不動於魔使  
於諸無礙解 瑜伽到彼岸 於說法談論 名為善慧地

身以智所成	如虛空無垢	諸佛皆所持	普徧如法雲
佛法之所依	行果皆所持	所依皆得轉	故名為法身
離不思議熏	及離流轉習	如汝思思者	云何而得知
超過諸語境	一切根非境	意識所取者	如所有我體
次第而積集	佛子大名稱	皆以法雲智	微細見法性
爾時洗濯心	超渡生死海	彼以大蓮華	安立為大座
無量寶葉光	寶光明為臺	無量億蓮華	普徧為眷屬
先以十種力	以無畏四種	餘佛不共法	大自在而坐
一切善皆集	福智以資糧	圓月在星宿	徧滿而圍繞
則以佛日手	以寶光無垢	灌頂於長子	普徧皆令灌
彼住大瑜伽	皆見以天眼	無明攪擾世	惡習苦怖畏
狀如金光色	從彼瑜伽光	彼無知所覆	得開無明門
以福智感招	彼獲無執定	隨緣而圓寂	心得皆變化

諸法無自性 自性於境界 菩薩王妙見 法身妙無垢  
皆以無垢身 安住於智海 即作眾生利 如巧摩尼珠  
一切瑜伽者 大瑜伽自在 佛影皆變化 徧滿而流出  
或有八臂者 三目熾盛身 彼皆瑜伽王 普徧而流出  
皆以慈悲手 勝喜執持弓 射以般若箭 皆斷細無明  
以大力昇進 執持智慧棒 一切無明殼 普徧皆碎壞  
強力諸有情 金剛熾盛身 調伏有情故 則為金剛手  
白為作業者 示現種種果 教誡如教理 變為平等王  
飢渴猛熾身 能施諸飲食 常患諸疾者 則為善醫王  
魔王於營從 魔女於莊嚴 菩薩作親友 能施菩提場  
猶如日月形 彼光皆悅意 流出如電光 照曜俱抵剎  
由以一燈故 徧照皆得然 若一燈滅盡 一切皆隨盡  
如是異熟佛 示現種種光 一化現涅槃 餘佛示歸寂

一亦無滅度 日光豈作暗 常現於出沒 示現刹土海  
於無智暗世 能淨智慧眼 往於俱胝刹 矜愍化有情  
彼皆不疲倦 由彼大慈甲 一切於神足 瑜伽皆彼岸  
皆觀時非時 令彼得流轉 剛強於詔曲 暫時而棄捨  
無量調有情 頓作令清淨 無量佛變化 頓時得暫變  
於三界海中 而擲調伏網 舒展妙法網 普徧令成熟  
則以調伏網 普徧令成熟 普徧令舉出 於中漂流者  
則如千有情 普徧令度已 度已令覺悟 妙法不生疑  
世尊妙法鈴 普徧令得聞 由此振聲故 除落煩惱塵  
增上無明人 令淨於一時 以日光明威 破壞眾翳膜  
隨從暗煩惱 及餘罪身者 令彼作利益 積漸令清淨  
彼彼人現化 安住如水月 煩惱攪擾心 不見於如來  
如餓鬼於海 普徧見枯竭 如是少福者 無佛作分別

有情少福者 如來云何作 如於生盲手 安以最勝寶  
云何而能見 無上之法身 俱胝日光身 光網以圍繞  
諸天以少善 不能而得見 上次於大天 云何而得見  
彼色不能見 諸仙離煩惱 天修羅梵等 云何餘少慧  
然以佛威力 清淨自心故 能見如是類 獲得一切盛  
有情福端嚴 佛住彼人前 光明照耀身 三十二勝相  
彼如是丈夫 當見如大海 不經於多時 即得智如海  
世尊彼色身 安住於多劫 能調可調利 趣於戒種類  
廣壽大瑜伽 少壽何因故 多人俱胝餘 示現增減壽  
無量俱胝劫 以命命增長 因緣皆無盡 獲得無盡果  
若有相應顯此理 唯身以慧作分析  
彼人生於淨蓮華 聞法所說無量壽

百千誦大集經地藏菩薩請問法身讚

# 讚禮地藏菩薩懺願儀

明菩薩沙彌古吳智旭述

行者淨身口意。至尊像前。應念我及眾生。積迷造罪。無救無歸。大士洪慈。為歸為救。又念大士法身。及十方三寶。體常徧滿。無所不在。與我現前心性。平等無二。起深信解。如奉慈顏。敷具拱立。唱云。

一切恭敬。

一心頂禮。十方常住三寶。

總一禮已。是諸眾等。各各胡跪。嚴持香華。如法供養。唱云。

願此香華雲。遍滿十方界。供養一切佛尊法諸賢聖。無邊佛土中。

受用作佛事。

至此停唱。燒香。散華。至心想云。一切佛法僧寶。體常徧滿。無所不在。願今以此香華。等同法性。普薰一切諸佛刹土。施作佛事。十方一切供具。無時不有。我今當以十方所有。一切種種香華瓔珞幢幡寶蓋。諸妙珍飾。種種音樂。燈明燭火。飲食衣服。臥具湯藥。乃至盡十方所有。一切種種莊嚴供養之具。憶想遙擬。普共眾生。奉獻供養。一切世界中。有修供養者。我今隨喜。若未修供養者。願得開導。令修供養。又願我身。速能

遍至一切刹土。於一一佛法僧所各以一切種種莊嚴供養之具。共一切眾生等持奉獻。供養一切諸佛法身舍利形像。浮圖廟塔一切佛事。供養一切所有法藏。及說法處。供養一切賢聖僧眾。願共一切眾生。修行如是供養已。漸得成就六波羅蜜。四無量心。深知一切法。本來寂靜。無生無滅。一味平等。離念清淨。畢竟圓滿。想已起云。

供養已。一切恭敬。

一禮已。次復合掌。讚云。

南無地藏菩薩摩訶薩。以神通力。現聲聞相。是諸微妙。功德伏藏。  
是諸解脫。珍寶出處。是諸菩薩。明淨眼目。是趨涅槃。商人導首。  
如如意珠。雨眾財寶。隨所希求。皆令滿足。照行善者。猶如朗日。  
照失道者。猶如明炬。除煩惱熱。如月清涼。渡四流者。為作橋樑。  
趨彼岸者。為作船筏。伏諸外道。如師子王。降諸天魔。如大龍象。  
護諸怖畏。如親如友。防諸怨敵。如塹如城。救諸危難。猶如父母。  
藏諸怯劣。猶若叢林。令諸有情。善根不壞。現妙境界。令眾欣悅。  
勸發有情。增上慚愧。求福慧者。令具莊嚴。能無功用。轉大法輪。

殊勝功德。不能測量。久修堅固。大願大悲。勇猛精進。過諸菩薩。於一食頃。至心歸依。稱名念誦。禮拜供養。能令一切。皆離憂苦。求諸所願。速得滿足。安置生天。涅槃之道。故我一心。歸命頂禮。

讚已。一禮。添香。致敬。唱云。

一心頂禮。本師釋迦牟尼如來。

拜下想云：能禮所禮性空寂。感應道交難思議。我此道場如帝珠。釋迦如來影現中。我身影現如來前。頭面接足歸命禮。下皆如此唯改佛名。

一心頂禮。過去師子奮迅具足萬行如來。覺華定自在王如來。

一心頂禮。一切智成就如來。清淨蓮華目如來。

一心頂禮。無邊身如來。寶性如來。波頭摩勝如來。師子吼如來。

一心頂禮。寶勝如來。寶相如來。袈裟幢如來。大通山王如來。

一心頂禮。淨月佛。山王佛。智勝佛。淨明王佛。智成就佛。

無上佛。妙聲佛。滿月佛。月面佛。如是等不可說諸佛如來。

一心頂禮。拘留孫佛。毗婆尸佛等七佛如來。

一心頂禮。普光佛等五十三佛如來。

一心頂禮。過去殞伽沙等諸佛如來。

一心頂禮。忉利天宮十方集會無量世界。不可說不可說一切諸佛如來。

一心頂禮。未來淨住世界安樂劫中無相如來。及

十方三世一切諸佛如來。

一心頂禮。十方一切諸佛所有色身舍利形像。浮圖廟塔一切佛事。

想云：諸佛法身如虛空。化身住世難思議。我皆影現化事前。一一皆悉歸命禮。

一心頂禮。地藏菩薩本願經。大乘大集地藏十輪經。占察善惡業報經。

及十方三世一切法藏。

總三禮想云：真空法界如虛空。常住法寶難思議。我皆影現法寶前。莫不皆悉歸命禮。

一心頂禮。文殊師利菩薩。財首菩薩。定自在王菩薩摩訶薩。

想偈如佛。但改菩薩名字。下皆倣此。

- 一心頂禮。無盡意菩薩。解脫菩薩。普賢菩薩摩訶薩。
- 一心頂禮。普廣菩薩。觀世音菩薩。虛空藏菩薩摩訶薩。
- 一心頂禮。好疑問菩薩。彌勒菩薩。金剛藏菩薩。堅淨信菩薩摩訶薩。
- 一心頂禮。十方三世一切菩薩摩訶薩。
- 一心頂禮。憍陳那尊者。優婆離尊者。目犍連尊者。
- 一切聲聞緣覺賢聖僧。
- 一心頂禮。忉利宮中。分身來集地藏菩薩摩訶薩。
- 一心頂禮。大集會中現聲聞相地藏菩薩摩訶薩。
- 一心頂禮。占察經中善安慰說地藏菩薩摩訶薩。
- 一心頂禮。入能發智定地藏菩薩摩訶薩。
- 一心頂禮。入具足無邊智定地藏菩薩摩訶薩。
- 一心頂禮。入具足清淨智定地藏菩薩摩訶薩。
- 一心頂禮。入具足慚愧智定地藏菩薩摩訶薩。

一心頂禮。入具足諸乘明定地藏菩薩摩訶薩。  
一心頂禮。入無憂神通明定地藏菩薩摩訶薩。  
一心頂禮。入具足勝通明定地藏菩薩摩訶薩。  
一心頂禮。入普照諸世間定地藏菩薩摩訶薩。  
一心頂禮。入諸佛燈炬明定地藏菩薩摩訶薩。  
一心頂禮。入金剛光定地藏菩薩摩訶薩。  
一心頂禮。入智力難催伏定地藏菩薩摩訶薩。  
一心頂禮。入電光明定地藏菩薩摩訶薩。  
一心頂禮。入具足上妙味定地藏菩薩摩訶薩。  
一心頂禮。入具足勝精氣定地藏菩薩摩訶薩。  
一心頂禮。入上妙諸資具定地藏菩薩摩訶薩。  
一心頂禮。入無諍智定地藏菩薩摩訶薩。  
一心頂禮。入能引勝踊躍定地藏菩薩摩訶薩。

- 一心頂禮。入具足世路光定地藏菩薩摩訶薩。
- 一心頂禮。入善住勝金剛定地藏菩薩摩訶薩。
- 一心頂禮。入增上觀勝幢定地藏菩薩摩訶薩。
- 一心頂禮。入具足慈悲聲定地藏菩薩摩訶薩。
- 一心頂禮。入引集諸福德定地藏菩薩摩訶薩。
- 一心頂禮。入海電光定地藏菩薩摩訶薩。
- 一心頂禮。能入如是殃伽沙等諸定。成熟一切有情地藏菩薩摩訶薩。
- 一心頂禮。以諸定力除刀兵劫地藏菩薩摩訶薩。
- 一心頂禮。以諸定力除疫病劫地藏菩薩摩訶薩。
- 一心頂禮。以諸定力除饑饉劫地藏菩薩摩訶薩。
- 一心頂禮。以諸定力除天災人禍劫地藏菩薩摩訶薩。

禮竟。如前想偈畢。復作是念。

我及眾生。無始常為。三業六根。重罪所障。不見諸佛。不知出要。但順生死。不知妙

理。我今雖知。猶與眾生。同為一切。重罪所障。今對地藏。十方佛前。普為眾生。歸命懺悔。為願加護。令障消滅。

作是念已。胡跪。唱言。

普為法界一切眾生。父母師長。兄弟姊妹。子女親眷。同修道友等。

悉願斷除三障。歸命懺悔。

唱已。五體投地。復作是念。

我與眾生。無始來今。繇愛見故。內計我人。外加惡友。不隨喜他。一毫之善。惟遍三業。廣造眾罪。事雖不廣。惡心遍布。晝夜相續。無有間斷。覆諱過失。不欲人知。不畏惡道。無慚無愧。撥無因果。故於今日。深信因果。生重慚愧。生大怖畏。發露懺悔。斷相續心。發菩提心。斷惡修善。勤策三業。翻昔重過。隨喜凡聖。一毫之善。念十方佛。有大福慧。能救拔我。及諸眾生。從二死海。置三德岸。從無始來。不知諸法。本性空寂。廣造眾惡。今知空寂。為求菩提。為眾生故。廣修諸善。徧斷眾惡。惟願地藏。慈悲攝受。作是念已。應起胡跪。唱言。

至心懺悔。我弟子（□□）與父母師長、兄弟姊妹、子女親眷、同修道友等、法界眾生。

自迷法性。枉受輪迴。無明覆心。不知出要。懷聰明慢。自實愚癡。  
聞大乘法。謬生空解。撥無因果。斷滅善根。遠離正信。遠離正願。  
離正意樂。及以正見。遠善知識。好處好時。遠離淨戒。正定正慧。  
隨逐惡友。起諸邪見。造身語意。無量罪業。或復毀謗。大乘法。  
或復毀謗。獨覺乘法。或復毀謗。聲聞乘法。障蔽隱沒。不令流布。  
或復於彼。諸佛弟子。若是法器。若非法器。具足破戒。下至無戒。  
著片袈裟。剃鬚髮者。多行忿恨。訶罵毀辱。譏刺誹謗。隱善揚惡。  
以麤惡言。期剋迫憊。打棒傷害。侵奪衣鉢。侵奪資生。絕其飲食。  
退令還俗。脫其袈裟。枷索繫縛。禁閉牢獄。輕慢觸惱。令不安樂。  
奪奪堵波。及僧祇物。十惡五逆。至一闡提。乘此業緣。於無量劫。  
墮諸惡趣。備歷三塗。受種種苦。痛楚難言。設得值遇。無量諸佛。  
及大菩薩。親承供養。發露懺除。復更護持。無量道法。修學無量。  
難行苦行。由彼業障。有餘未盡。令我等輩。未能證得。安樂涅槃。

未能證得。三摩地門。殊勝功德。今向  
地藏菩薩摩訶薩。及諸佛世尊。

發大乘心。弘如來教。為令此土。三寶種性。威德熾盛。久住世故。  
為欲摧滅。一切眾生。堅固煩惱。令無餘故。與諸眾生。復深慚愧。  
發露懺悔。求悉消滅。惟願十方諸大慈尊。及地藏大士。  
哀愍覆護。濟拔我等。令此罪障。皆得除滅。永不復受。惡趣苦果。  
我等今者。對世尊前。及與大士。以至誠心。發真誓願。從今以去。  
乃至菩提。常願不遇。如是惡緣。決定不造。如是重罪。終不毀謗。  
諸佛正法。亦不觸惱。諸出家人。必不挑壞。眾生法眼。亦不斷滅。  
三寶種性。惟願世尊。及與大士。攝受證知。所發誓願。  
令我等早成十法。及成十輪。獲得無罪。正路法忍。於三乘法。  
若三乘人。及非法器。得無誤失。於大乘法。昇進無轉。利慧勝福。  
常得增長。於一切定。諸陀羅尼。諸忍諸地。速得自在。常得值遇。

諸善知識。常得不離。見一切佛。及諸菩薩。聲聞弟子。不離聞法。不離親近。供養眾僧。於諸善根。常能精進。菩提行願。無厭足心。先所造惡。摧壞散滅。速能證得。無上法輪。善巧方便。成熟眾生。皆令獲得。利益安樂。

或一說或三說。起立唱云。

懺悔發願已。歸命禮三寶。

一禮已。起立。正身運想。一切三寶。徧滿虛空。安坐法座。一一迴身。如法旋遶。此身如影。音聲如響。普徧十方。上供三寶。下警群靈。勿令心散。和雅唱云。

南無十方佛。

南無十方法。

南無十方僧。

南無本師釋迦牟尼佛。

南無地藏菩薩本願經。

南無大乘大集地藏十輪經。

南無占察善惡業報經。

南無地藏菩薩摩訶薩。

或三稱。或七稱。旋遶既畢。迴身至法座前。立正。舉讚。

地藏大士。誓願宏深。明珠照破鐵圍城。

金錫振幽冥。花雨繽紛。大地布陽春。

南無地藏王菩薩摩訶薩。三稱

◎迴向偈

禮懺功德殊勝行。無邊勝福皆迴向。

願消三障諸煩惱。願得智慧真明了。

普願災障悉消除。世世常行菩薩道。

十方三世一切佛。一切菩薩摩訶薩。

摩訶般若波羅蜜。

自皈依佛。當願眾生。體解大道。發無上心。

自皈依法。當願眾生。深入經藏。智慧如海。

自皈依僧。當願眾生。統領大眾。一切無礙。

和南聖眾。

自皈依地藏菩薩。當願眾生發菩提心。求生淨土。

再禮佛三拜。問訊畢。次至靜室。或念地藏菩薩名。或持滅定業真言。或觀大士平等法身。或作唯心識等二種觀道。唯信唯篤。則必能滅障。必證法忍矣。

地藏菩薩心咒及滅定業真言（二十一遍或百零八遍）

## 讚禮地藏菩薩懺願儀終

## 祈願迴向

諸佛法身，本無去亦無來。為度眾生，示有生而有滅。圓明四智，高昇於第一義天。滿足萬德，影散於十方刹海。為大施主，方隨意之寶珠。作大醫王，等善見之藥樹。有請必應，若空谷以傳聲。等益群生，似春光而散彩。我等眾生，沈淪五濁，常嬰八苦。為覲覲相好之身，今聞功德名號。謹此嚴淨壇場，備陳香供。遙空瞻仰，稱名頂禮。

弟子眾等，一心皈命奉請：以身、口、意，三密善業遍滿十方，一時禮拜、讚嘆、奉請、供養。恭請諸佛、菩薩、眷屬，聲聞，衛法天龍，顯密神王，各遊解脫之門，同趣一乘之道。引接群生，莊嚴佛會。祈伸請以來臨，轉如來法輪。運大慈悲心，共垂拯濟。

願所求必賜：令諸大眾，安和利樂，隨喜見聞，均霽勝利，生未生之福慧，淨當淨之愆尤。遠暨十方無邊法界，六道四生，含靈抱識，多生父母，有緣親眾，等釋愆尤，同登解脫。願諸世界，風調雨順，物阜民安，諸緣適意。再祈大悲堅固，不捨群生。我等哀求，願賜加被，生淨佛刹，獲妙總持，眾善爭集。普賢行願，疾得圓滿，財法二施，福慧二嚴。窮未來際，莊嚴法界，願不停息。惟願諸佛、諸大菩薩，冥勳加被，圓滿一切祈願。

三寶弟子眾等叩謝宏恩為大眾祈願迴向